

**ՆԱՐԵԿ**  
**ԱՂՕԹԱՄԱՏԵԱՆ**  
**Ս. ԳՐԻԳՈՐ ՆԱՐԵԿԱՅԻՈՅ**

**Բան ՂԲ.**

Ա.— Արդար արեգակ, օրհնեալ ճառագայթ, կերպարանք լոյսի, անձկալի փափաք, անքննելի բարձրեալ, անպատմելիօրէն զօրեղ, բարիներու բերկրութիւն, յոյսի ներկայութիւն, երկնաւոր գովեալ, փառքի թագաւոր, արարիչ Քրիստոս, խոստովանուած կեանք: Եղկելիիս բազմաախալ խօսքերուն վրիպալից թերութիւնը Քու ամենագօր խօսքովդ լեցնելով՝ բարձրեալ Հօրդ ներկայացո՛ւր, իբրեւ աղերս հաճելի: Դուն որ ինծի համար եկար, անէծքի ենթարկուեցար խաչի մահով, եւ իմ նմանութիւնս վրադ առիր, ո՛վ կեանքի լիակատար օրհնութիւն, բոլոր վերիններուն եւ վարիններուն բարեխնամ տեսուչը: Որովհետեւ եթէ յանձն առիր ինծի համար մեռնիլ, ո՛վ ամենուն տէրն ու Աստուածը, ո՛րչափ աւելի պիտի հիմակ հաճիս կարեկցիլ իմ տաժանելի չարչարանքներուս, ինծի պէս յանցաւորին տեղը ըստ մարդկութեանդ աղօթելով Հօրդ, որուն համապատիւ ես աստուածութեամբդ:

Բ.— Ու պատուական արինիդ շնորհիւ, որ միշտ կը մատուցուի առաքողիդ կամքը հաճեցնելու համար, թո՛ղ ջնջուին մեղաւոր դատապարտեալիս պատիժները, ներուի՛ն յանցանքները, փարատի՛ ամօթը, մոռցուի՛ խայտառականքը, բարեփոխուի՛ դատակնիքը, վերցուի՛ լացը. հանդարտի՛ ատամներու կրճտումը, սպառի՛ն ողբերը, կտրուի՛ արցունքը, մերժուի՛ սուգը, հալածուի՛ խաւարը, հասնի՛ սաստիկ կրակը, մերժուի՛ն բազմակերպ տանջարանները:

Գ.— Թող գայ կամեցողիդ եւ ամէն կեանք պարգեւողիդ գթութիւնը, թող ծագի լոյսդ, թող շտապէ փրկութիւնդ, հասնի՛ օգնութիւնդ, ժամանէ՛ այցելութիւնդ, կանխէ՛ ողորմութեանդ ցօղը, փութայ արբեցնէ՛ պասքած անդաստանները՝ թշուարութեամբ մահուան վիհը ինկած ոսկորներուն. երկնաւոր բաժակը Կենարարիդ արինին, որ անսպառօրէն կը պատարագուի ի յիշատակ ննջեցեալ հոգիներուն կենաց փրկութեան, թող ծաղկեցնէ, պտղաբերէ մարմինիս գետինը, դարման տանելով անոր՝ յարութեան լուսաւոր օրուան համար: Որպէսզի մարմինիս մեղքերովը բոլորովին մահացած հոգիս Քու շնորհիւդ, ո՛վ Գղաձ, Քու մէջդ զօրանալով՝ Քեզմով նորոգուի, արդարներու յարութեան աստէն ազատի մեղքերէն, անմահ կենդանութեամբ, Հօրդ օրհնութեամբը, որուն հետ փառք Քեզի, Սուրբ Հոգիիդ՝ բարեբանութիւն վայելուչ գոհութեամբ. այժմ եւ միշտ եւ յաւիտեանս յաւիտենից. ամէն:

---

Բառարան

Անձկալի - Կարօտալի, ցանկալի

Եղկելի - Ողորմելի, խղճալի

Թերութիւն - Պակասութիւն

Աղերս - Աղաչանք

Փարատել - Անհետացնել

Ժամանել - Գալ, հասնիլ:

Պասքիլ - Մաստիկ ծարաւիլ

Վիհ - Անդունդ, խորխորատ

Գետին - Հողի երես, յատակ, հող